

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

**ZAKLJUČAK**  
**o obustavljanju dijela postupka**

**po Zahtjevu privrednog subjekta HIFA d.o.o. Tešanj protiv Zavoda za ispitivanje kvalitete d.o.o. Mostar, Sv. Leopolda Mandića 9/1, 88 000 Mostar i drugi**



Broj: 01-26-3-021-56-II/15  
Sarajevo, 09.12.2015. godine

Konkurencijsko vijeće Bosne i Hercegovine je na osnovu člana 42. stav (2) Zakona o konkurenciji („Službeni glasnik BiH“, br. 48/05, 76/07 i 80/09), te člana 122. stav (2) i člana 123. stav (1) Zakona o upravnom postupku („Službeni glasnik BiH“, br. 29/02, 12/04, 88/07, 93/09 i 41/13), u postupku pokrenutom zaključkom o pokretanju postupka broj 01-26-3-021-8-II/15 od 10.09.2015. godine, protiv privrednih subjekata Zavod za ispitivanje kvalitete d.o.o. Mostar, Sv. Leopolda Mandića 9/1, 88 000 Mostar i drugi, odlučujući po zahtjevu podnosioca zahtjeva za pokretanje postupka HIFA d.o.o. Tešanj, Krndije bb, 74 260 Tešanj broj 01-26-3-021-21-II/15 od 20.09.2015, na 114. (stotinučetnaestoj) sjednici održanoj dana 09.12.2015. godine, donijelo

### **Z A K L J U Č A K** **o obustavljanju postupka**

1. Obustavlja se postupak pokrenut po Zaključku za pokretanje postupka broj 01-26-3-021-8-II/15 od 10.09.2015. godine, u dijelu koji se odnosi na privredni subjekt Lider – Control d.o.o. Sokolac, Jove Jankovića bb, 71350 Sokolac, zbog povlačenja zahtjeva podnosioca zahtjeva za pokretanje postupka, HIFA d.o.o. Tešanj, u odnosu na naznačeni privredni subjekt.
2. Ovaj Zaključak je konačan i bit će objavljen u „Službenom glasniku BiH“, službenim glasilima entiteta i Brčko distrikta Bosne i Hercegovine.

### **O b r a z l o ž e n j e**

Konkurencijsko vijeće je dana 22.06.2015. godine, zaprimilo Zahtjev za pokretanje postupka pod brojem: 01-26-3-021-II/15 (u daljem tekstu: Zahtjev) privrednog subjekta HIFA d.o.o. Tešanj, Krndije bb, 74 260 Tešanj (u daljem tekstu: Podnosilac zahtjeva ili HIFA) protiv privrednih subjekata HERKON d.o.o. Mostar, Biskupa Čule 10, 88 000 i Zavod za ispitivanje kvalitete d.o.o. Mostar, Sv. Leopolda Mandića 9/1, 88 000 Mostar (u daljem tekstu: Protivna strana), koji se odnosi na ocjenjivanje zakonitosti Odluke o povećanju cijena monitoringa kvaliteta tečnih naftnih derivata broj SAO-482/8 od 22.05.2008. godine (u daljem tekstu: Odluka), odnosno, utvrđivanja da li je ista Odluka u suprotnosti sa članom 4. Zakona o konkurenciji (u daljem tekstu: Zakon). Naknadnom dopunom zahtjeva (podnesak broj: 01-26-3-021-4-II/15 od 18. avgusta 2015. godine) zahtjev je proširen i na privredne subjekte Lider – Control d.o.o. Sokolac, Jove Jankovića bb, 71350 Sokolac, Sistem Qualita d.o.o. Jovana Cvijića 2b, 71420 Pale, Buro-Inspekt d.o.o. Doboj, Osječani bb, 74225 Doboj, Inspekt RGH d.o.o. Sarajevo, Hamdije Kreševljakovića 18/I, 71000 Sarajevo i SiM Control d.o.o. Bijeljina, Stefana Dečanskog bb, Bijeljina (u daljem tekstu: Protivna strana) kao supotpisnike Odluke.

Konkurencijsko vijeće je zaključilo da nije moguće bez provedenog postupka utvrditi postojanje povrede Zakona navedene u Zahtjevu, te je donijelo Zaključak o pokretanju postupka, dana 10.09.2015. godine broj: 01-26-3-021-8-II/15 koji se odnosi na ocjenjivanje zakonitosti Odluke o povećanju cijena monitoringa kvaliteta tečnih naftnih derivata broj SAO-482/8 od 22.05.2008. godine odnosno da li je ista Odluka u suprotnosti sa članom 4. stav (1) tačka a), b) i d) Zakona o konkurenciji.

U smislu člana 33. stav (1) Zakona, Zahtjev i Zaključak o pokretanju postupka, Konkurencijsko vijeće je dopisom broj: 01-26-3-021-14-II/15 od dana 11.09.2015. godine poslalo na očitovanje privrednom subjektu Lider – Control d.o.o. Sokolac, Jove Jankovića bb, 71350 Sokolac, a potom je isti vraćen Konkurencijskom vijeću od strane Pošte Sarajevo sa naznakom da navedeni privredni subjekt ne postoji.

U vezi sa navedenim, Konkurencijsko vijeće se obratilo Podnosiocu zahtjeva dopisom broj: 01-26-3-021-20-II/15 od dana 19.09.2015. godine da se očituje po navedenom, odnosno da dostavi tačne podatke koji se odnose na privredni subjekt Lider – Control d.o.o. Sokolac, Jove Jankovića bb, 71350 Sokolac, u svrhu daljeg nastavka postupka.

Podnosilac zahtjeva je podneskom zaprimljenim pod brojem: 01-26-3-021-21-II/15 dana 20.09.2015. godine naveo da nije uspio saznati da li privredni subjekt Lider – Control d.o.o. Sokolac, Jove Jankovića bb, 71350 Sokolac postoji, s obzirom da je sporna Odluka potpisana 2008. godine i postoji mogućnost da privredni subjekt više ne postoji, te predlažu da se donese Zaključak o obustavi postupka u dijelu koji se odnosi na privredni subjekt Lider – Control d.o.o. Sokolac, Jove Jankovića bb, 71350 Sokolac, iz razloga što privredni subjekt ne postoji.

U skladu sa članom 122. stav (1) Zakona o upravnom postupku, stranka može odustati od svog zahtjeva (cijelog ili dijela) u toku cijelog postupka. Također, članom 123. stav (1) Zakona o upravnom postupku je određeno da stranka može opozvati svoje odustajanje od zahtjeva, sve dok tijelo koje vodi postupak ne donese zaključak o obustavljanju postupka i isti ne dostavi stranci.

U skladu sa članom 122. stav (3) Zakona o upravnom postupku organ koji provodi postupak može nastaviti postupak po službenoj dužnosti ukoliko je to u javnom interesu. S tim u vezi, Konkurencijsko vijeće je u smislu člana 35. Zakona, zatražilo podatke i dokumentaciju i od drugih tijela /institucija /privrednih subjekta koje nisu stranke u postupku, a kako bi utvrdilo da li je privredni subjekt Lider – Control d.o.o. Sokolac aktivan.

U tom smislu, Konkurencijsko vijeće se u toku postupka dana 19.10.2015. godine dopisom broj: 01-26-3-021-37-II/15 obratilo Okružnom privrednom sudu Istočno Sarajevo, a dana 20.11.2015. godine dopisom broj: 01-26-3-021-47-II/15 godine i broj: 01-26-3-021-48-II/15 se obratilo Poreskoj upravi RS i Agenciji za posredničke, informatičke i finansijske usluge Banja Luka sa zahtjevom za dostavom podataka koji se odnose na privredni subjekt „Lider – Control“ d.o.o. Sokolac.

Konkurencijsko vijeće je dana 04.11.2015. godine zaprimilo podnesak broj: 01-26-3-021-42-II/15 Okružnog privrednog suda Istočno Sarajevo kojim je dostavljen izvod iz sudskog registra za privredni subjekt „Lider – Control“ d.o.o. Sokolac iz kojeg je evidentno da nije brisan iz pravnog prometa.

Dana 27.11.2015. godine Konkurencijsko vijeće je zaprimilo podnesak Poreske uprave RS (broj: 01-26-3-021-51-II/15) u kojem se navodi da se privredni subjekt „Lider – Control“ d.o.o. Sokolac nalazi u registru poreskih obveznika i da je posljednju poresku prijavu podnio u 2011. godini i podnesak Agencije za posredničke, informatičke i finansijske usluge Banja Luka (broj: 01-26-3-021-48-II/15) u kojem se navodi da se privredni subjekt „Lider – Control“ d.o.o. Sokolac nalazi u registru finansijskih izvještaja i da finansijske izvještaje nije predavao od 2010. godine.

Također, u podacima Vanjsko trgovinske komore Bosne i Hercegovine (dopis broj: 01-05-1719-3/15 od 10.11.2015. godine) koji se odnose na spisak svih akreditovanih tijela u Bosni i Hercegovini koji se bave monitoringom tečnih naftnih goriva koji su članovi Asocijacije akreditovanih tijela za ocjenu kvaliteta, certifikaciju i verifikaciju ustanovilo je da se na navedenoj listi ne nalazi privredni subjekt „Lider – Control“ d.o.o. Sokolac.

Nadalje, uvidom u isti dokument utvrđeno je da se na adresi privrednog subjekta „Lider – Control“ d.o.o. Sokolac nalazi i privredni subjekt „Inspekt RS“ d.o.o. Bijeljina. Službeno lice Konkurencijskog vijeća je vezano za ovu okolnost kontaktiralo privredni subjekt „Inspekt RS“ d.o.o. Bijeljina putem telefona (dana 17.11.2015. godine) i dobilo informaciju da prema njihovom saznanju privredni subjekt „Lider – Control“ d.o.o. Sokolac ne radi već 4 (četiri) godine, te da im nije poznato da li su i

pravno prestali da postoje (ugašeni) i da su se prije nalazili nekoliko poslovnih prostora niže u istoj ulici (ulica je bb), odnosno da se u poslovnom prostoru njihove firme nije nikad nalazio „Lider – Control“ d.o.o. Sokolac.

Na osnovu navedenoga Konkurencijsko vijeće je ocijenilo da sve okolnosti ukazuju da privredni subjekt „Lider – Control“ d.o.o. Sokolac nije više aktivan, te je imajući u vidu prijedlog Podnosioca zahtjeva da se donese zaključak o obustavi postupka u dijelu koji se odnosi na privredni subjekt Lider – Control d.o.o. Sokolac, odlučilo kao u dispozitivu ovog Zaključka.

### **Administrativna taksa**

Na ovaj Zaključak Podnosilac zahtjeva, u skladu sa članom 2. Tarifni broj 108. stav (1) tačka b) Odluke o visini administrativnih taksi u vezi sa procesnim radnjama pred Konkurencijskim vijećem („Službeni glasnik BiH“, br. 30/06 i 18/11) je obavezan platiti administrativnu taksu u iznosu od 500,00 KM u korist Budžeta institucija Bosne i Hercegovine.

### **Pouka o pravnom lijeku**

Protiv ovog Zaključka nije dopuštena žalba.

Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovog Zaključka.

**Predsjednica**

**mr. Arijana Regoda Dražić**